

## 每週經課朗誦經文（巴克禮台語漢字）2015/06/07

### 共同經課-1 撒母耳記上八章四節～二十節、十一章十四節～十五節

4 以色列的長老攏聚集，到拉瑪見撒母耳，5 給伊講：「看啊，你已經老，你的子無行你的路。今求你給阮設立一個王判斷阮，親像列國一樣。」6 in 講「求你給阮設立一個王判斷阮」彼個事撒母耳無歡喜，撒母耳就祈禱耶和華。7 耶和華對撒母耳講：「百姓對你所講一切的話，你著趁，因為 in 毋是棄揀你，是棄揀我，無互我做 in 的王。8 對我導 in 出埃及到今仔日，in 一切的所有離開我，去服事別個上帝。今也照按呢款待你。9 所以你著趁 in 的話，總是著嚴嚴警戒 in，互 in 知將來管理 in 的王的制度是怎樣。」10 撒母耳用耶和華的話攏給百姓講，就是許個對伊討一個王的，講：11 「將來管理恁的王的制度就是按呢：伊欲取恁的子為家己設立伊給伊管車，做伊的馬兵，走佇車的頭前；12 閣欲為家己設立 in 做千總、五十夫長，也欲設立人給伊作園，收五穀，製造軍器及車裡的器具；13 欲取恁的查某子給伊製造芳油，做煮食者做焗餅者；14 恁的田園、葡萄園、橄欖園彼個上好的，伊欲取伊來互伊的奴僕。15 恁所種作的及恁的葡萄園，伊欲取十份一互伊的太監及奴僕；16 閣欲取恁的奴僕奴婢，勇健的少年人及恁的驢，來做伊的差用。17 恁的羊群伊欲取十份的一份，恁也欲做伊的奴僕。18 彼時恁欲因為所揀的王來喉叫，總是耶和華佇彼時毋聽恁。」19 總是百姓毋肯聽撒母耳的話，講：「毋啊！阮的確欲一個王治理阮，20 互阮親像列國一樣，阮的王判斷阮，做頭導阮，替阮交戰。」

### 共同經課-2 詩篇一百三十八篇

1 〔大衛的詩。〕我欲專心感謝你，佇諸個上帝的面前欲唱歌謳咗你。2 我欲向你的聖殿跪拜，因為你的慈愛及誠實謳咗你的名；因為你互你的話做大，贏過你所有的名。3 我求叫的日，你就應我，鼓舞我，互我的心有氣力。4 耶和華啊，世上的君王攏欲感謝你，因為 in 有聽見你的嘴所講的話。5 in 欲唱歌謳咗耶和華的行做，因為耶和華的榮光真大。6 耶和華雖然真高，猶久看顧卑微的人；總是伊對遠遠看出驕傲的人。7 我雖然行佇患難中，你欲互我活；我的對敵受氣，你欲伸手來抵當伊；你的正手亦欲救我。8 關係我的事耶和華欲成伊；耶和華啊，你的慈愛永遠佇啲！求你莫得放揀你的手所造的。

### 共同經課-3 哥林多後書四章十三節～五章一節

13 總是阮已經有此個信的神，抵抵照所記載講：「我有信，所以有講。」阮也信，所以也講。14 家己知互主耶穌復活的，也欲互阮及耶穌復活，閣欲引進阮及恁相及倚佇伊的面前。15 因為萬項事攏是為著恁，欲互恩典對人愈多來愈加添，就互感謝益發充滿，致到上帝得著榮光。16 所以，阮無餒志。阮的外體雖然敗壞，若是阮的內心日日換新。17 因為阮目聶(nih)久輕輕的艱苦，是給阮成上等上、永遠的大榮光。18 因為阮毋是看佇所會看見的，是看佇所袂看見的；因為所會看見的是暫時，所袂看見的是永遠。5:1 因為阮知，阮佇地裡布棚的厝若毀壞，就有對上帝所起造，毋是人的手所造的厝，是永遠佇天裡的。

### 共同經課-4 馬可福音三章二十節～三十五節

20 耶穌入厝，眾人閣聚集，致到 in 袂顧得食。21 伊的親人聽見，就出來欲給伊掠啲，因為講伊是癲狂。22 對耶路撒冷落來的經學講士講：「伊是互別西卜附身」；閣講：「伊是倚靠鬼王來趕鬼。」23 伊叫 in 來，設譬喻給 in 講：「撒旦豈可會趕撒但？24 國若家己爭拚，彼個國就倚袂住；25 家若家己爭拚，彼個家也倚袂住。26 撒但若起來家己爭拚，伊也倚袂住，的確會滅。27 無人會入猛人的厝，來劫伊的傢伙；著代先縛彼個猛人，然後才欲劫伊的厝。28 我實在給恁講，見若世間人所犯的罪及 in 所謗瀆一切謗瀆的話攏欲赦免 in；29 獨獨見若謗瀆聖神的，永遠無得著赦免，就是犯著永世代的罪。」30 這是因為許個人講：「伊患著邪神。」31 伊的老母及伊的兄弟來，倚佇外面，差人去叫伊。32 有歸陣的人圍伊啲坐，有人給伊講：「你看，你的老母及你的兄弟佇外面啲尋你。」33 伊就應講：「甚麼人是我的老母？我的兄弟啊？」34 就四界看許個圍伊啲坐的人，講：「你看，我的老母，及我的兄弟。35 因為見若行上帝的旨意的就是我的兄弟姊妹及老母。」